

**Uunga siunnersuut: Inatsisartut aalajangiiffisassaattut siunnersuut, Naalakkersuisut peqquneqassasut suleqatigiissitamik pilersitsissasut Kalaallit Nunaanni filmiortartut silarsuaata qanoq nukittorsarsinnaaneranut innersuussuteqartussanik. Naalakkersuisut sapinngisaq tamaat suleqatigiissitami attuumassuteqartut peqataatissavaat. Siunnersuutit UPA 2023-mi saqqummiunneqassapput.**

*(Inatsisartunut Ilaasortaq Nivi Olsen, Demokraatit)*

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu  
Ataatsimiititaliap**

**Siunnersuutip aappasaanneerqarnerani**

### **ISUMALIUTISSIISUTAA**

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Doris Jakobsen Jensen, Siumut, Siulittaasoq  
Inatsisartunut ilaasortaq Nivi Olsen, Demokraatit, Siulittaasup tullia  
Inatsisartunut ilaasortaq Adam Kristensen, Inuit Ataqatigiit, sinniisoq  
Inatsisartunut ilaasortaq Dines Mikaelson, Siumut  
Inatsisartunut ilaasortaq Mariia Simonsen, Inuit Ataqatigiit

UPA2022-mi 10. maj 2022 siullermeerinninnerup kingorna siunnersuut ataatsimiititaliap misissorpaa.

#### **1. Siunnersuutip imarisaa siunertaalu**

Kalaallit Nunaanni filmiortartut silarsuaata qanoq nukittorsarneqarsinnaaneramik innersuussuteqartussanik suleqatigiissitanik Naalakkersuisut pilersitsinissamik peqquneqarnissaat siunnersuutip matuma siunertarivaa. UPA2023-mi innersuussutit saqqummiunneqassapput soqutigisaqatigiillu suliamut tulluuttut peqataatinneqarnissaat Naalakkersuisut sapinngisaq malillugu anguniassavaat.

#### **2. Aallartitat**

Ataatsimiititaliamut kattuffinnit, suliffeqarfinnit aamma peqatigiiffinnit aallartitaasut sassarput:

- Film.gl

Film.gl-imit saqqummiunneqartoq ilanngussatut kakkiunneqarpoq.

### 3. Siunnersuummik ataatsimiititaliap suliarinninnera

Siunnersuutip siullermeerneqarnerani partiit tamarmik siunnersuummut tapersiipput. Kalaallit Nunaanni filmiortartut silarsuaata nukittorsarneqarnissaa siammassisumik isumaqatigiissutaavoq. Imminut itinerusumik paasinninnermik kinaassusermillu angusaqarneq aamma nammineq oqaluttuarisaanermik oqaluttuarinnissinnaanissamik periarfissaqalerneq ilaatigut tunngavigisatut taaneqarput. Piviusulersaarutini takorluukkanillu filmiliani ukiut ingerlaneranni Kalaallit Nunaat inuilu sammineqartarsimapput. Kalaallit Nunaat inuilu pillugit akuttunngitsumik filmiliaqartarsimavoq kisianni Kalaallit Nunaannit inuinillu akuttunerusumik filmiortoqartartoq. Imaappoq nunatta filmiornerni qanoq saqqummiunneqarneranut innuttaasutta amerlasuutigut sunniuteqartarsimanngitsut. Ukiuni kingullerni kalaallinit ilitersuisunit kalaallinik isiginnaartitsisartunit annertuumik peqataatitsiviusunik mikinerusunik anginerusunilluunniit filmiortoqartarsimavoq.

Oqaaseq "Filmiornerup silarsuaa" siunnersuummi atorneqarpoq. Ataatsimiititaliap paasinninnera naapertorlugu pineqartut tassaapput filmiornermik suliaqartut, siammarterisut filminillu isiginnaartitsisut. Filmiornerup silarsuaata nukittorsarnera taamaallaat aningaasaqarnikkut ineriartorneruinaassanngitsaq, kisiannili aamma filmiornermi qanigisaqatigiit ineriartornissaannik uani ilisimasanik paarlaasseqatigiinnissamik ineriartortitseqatigiinnissamillu siunertaqartut ataatsimiititaliap maluginiarpaa.

#### 3.1 Taperneqarnissamut periarfissat

Kalaallit Nunaanni, Savalimmiuni Danmarkimilu piviusulersaarutinik suliaqarnissamut Norddok II-mi aningaasaliissutit aqutigalugit 27,1 mio. kr-nik immikkoortitsisoqarsimasoq ataatsimiititaliap maluginiarpaa. Kalaallit Nunaanni Danmarkimilu filmiornerup silarsuaani piginnaanngorsaanissamik attaveqarfigisinnaasanillu ineriartortitsinissamut aamma Naalagaaffeqatigiinneq pillugu qaammaasaqarnerulernissaq tapiissutip siunertaraa.

Kalaallit Nunaanni eqqumiitsuliornikkut suliaqarnermut tapiissutaasartut agguattarnerat 1. januar 2022-imiilli Kalaallit Nunaata Eqqumiitsuliornermut Aningaasaateqarfianit pisartussatut aalajangiunneqarpoq. Tassanngaanniit takorluukkanik piviusulersaarutinillu filmiornermut, tassungalu tunngatillugu aningaasartuutigisanut filmillu siammarternissaannut tapiissutinik filmiornerup silarsuaani qinnuteqarnissamut periarfissaqarpoq. Filmiornerup silarsuaani taperneqarnissamut assigiinngitsunik periarfissaqartoq ataatsimiititaliap maluginiarpaa. Kalaallit Nunaanni filminstituttimik maanna peqanngimmat taperneqarnissamut periarfissat pisinnaanngitsut Film.gl-imit ataatsimiititaliaq ilisimatinneqarpoq. Tamanna qulaajarneqartariaqarpoq siunnersuutigineqartoq akuerineqassagaluarpaa,

#### 3.2 Sassarnej

Siunnersuummik suliaqarnermini suliniaqatigiiffimmit Film.gl-imit sassarnissamik

qinnuteqaammik ataatsimiititaliaq tigusaqarpoq. Film.gl pingaarnertut filminstitutimik aamma filmkommissærimik ujartuisoq ataatsimiititaliap maluginiarpaa. Film.gl-imik oqaloqateqarneq tullinnguuttumi suliarineqassaaq.

### 3.2.1 Kalaallit Nunaanni filminstitutsi aamma filmkommissæri

Nunarsuarmi tamarmi filmiliornerup silarsuaani saaffiginnissutinik kiffartuussinerit aamma Kalaallit Nunaanni filmiliarineqarsimasut toqqortaatigineqarsinnaanerannik periarfissaqarneq, aningaasarpassuarnik iluaqutissiisinnaasunik filminstitutsimik pilersitsinikkut periarfissanik atorineqanngitsunik peqartoq suliniaqatigiiffik isumaqarpoq.

Europami filmiliornermi akademi danskillu filmiliornermik suliaqartunit aamma nunarsuarmi tamarmit filmiliornerup silarsuaani suliaqartunit soqutigisaqatigiinnillu saaffiginnissutinik amerlasuunik tigusaqartarlutik suliniaqatigiiffik nassuiaavoq.

Kalaallit Nunaanni isertitassarpassuugaluut ajoraluartumik annaaneqartarput filmiliornermi immiussinissamat Kalaallit Nunaanni filmiliorniartut nunanit allaneersut akiliiumasaraluarmata. Maanna tamakku aningaasat ilarpassui Danmarkimut Islandimullu nunarsuarmi filmiliornermik kiffartuussinermi akiliutaasartut aningaasarsiutaapput.

Kalaallit Nunaata kangiani immiussiniartunut Islandimit kiffartuussisoqartartoq Film.gl-imit ilaatigut oqaatigineqarpoq.

Naalackersuisunut filminstitut pillugu ukiualunnguit matuma siorna saqqummiussisimallutik Film.gl ilisimatitsivoq. Suleqatigiissitap suliaanut saqqummiussaq ilanngunneqartariaqartoq ataatsimiititaliap tikkuarpaa.

Filminstitutimut sinaakkutissat suusinnaanerinit ataatsimiititaliap apeqqutaanut Film.gl-imit nassuiarneqarpoq, pitsaanerpaassappat marlunnik ulloq naallugu sulisartunik kiisalu filmkommissærimik atorfeqartoqassagaluartoq, Film-gl-ip aamma siunnersuutigaa Eqqumiitsuliornikkut Pinngorartitsisut Ingerlatsisullu (EPI) aamma Filmiliorarfimmi maanna kiilerimiittut illu tamakkiisumik allattoqarfinngortillugu atorineqarsinnaasoq.

EPI-mit Filmiliorarfimmillu kiileri maanna attartortinneqartup saniatigut illu maanna atorineqanngilaq. Illu filminstitutsimut filmkommissærimullu atorineqarsinnaassagaluarpoq, nutaamimmi illuliorneq amerlasuunik aningaasartuuteqarnermik pisariaqartitsisinnaavoq ukiorpassuillu ingerlaneranni aatsaat naammassisinnerani ernummatigineqarsinnaalluni.

Film.gl sassarnissamat qinnuteqarsimammat, Kalaallit Nunaanni filmiliornerup silarsuaannut isummaminik saqqummiussimmat, qanorlu filmiliornerup silarsuaa siunissami periarfissaqarsinnaanerannik isummaminik saqqummiussimmat aaatsimiititaliap qujassuteqarfiginarpaa.

### 3.3 Suleqatigiissitap sulinermini sinaakkutissai, siunertaa ilaasortaalu

Naalackersuisut akissuteqaammini ima allaaserisaqarmata ataatsimiititaliap maluginiarpaa:

*”2022-p ukiaanerani kulturi pillugu isumasioqatigiittoqassaaq. Filmiliornermut ingerlataqartut tassunga aamma qaaqquneqassapput, ingerlataqartullu ilisimasatik aallaavigalugit Kalaallit Nunaanni filmiliornermut ingerlataqarneq qanoq nukittorsarneqarsinnaanersoq pillugu saqqummiussaqsarinnassallutik. Naalackersuisut naatsorsuutigaat, isumasioqatigiinneq suleqatigiissitamut pingaaruteqartunik immersuissasoq.”*

Susasaqartut tamarmik peqataaffigisinnaasaannik isumasioqatigiissitsinissamik tassani filmiliornerup silarsuaaniittut aamma ilanngullugit ingerlatsinikkut kulturimik pingaartitsinerat ataatsimiititaliap Naalackersuisut qujaffigivai. Siunnersuummi matumani sammeneqartumi suleqatigiissitamut susasaqartut tulluuttut peqataatinneqarnissaat ataatsimiititaliap tikkuartariaqarlugu misigaa. Ataasiaannarluni isumasioqatigiinnermi filmiliornerup silarsuaaniittut peqataatinnerat naammangitsoq kisiannili aamma suleqatigiissitamut peqataatinneqarnissaat ataatsimiititaliap paasinnittaasia naapertorlugu pisariaqarpoq.

Suleqatigiissitap aalajangersimasunik sulinermut sinaakkutaasussanik ataatsimiititaliap aalajangersaanissaminut kissaateqanngilaq, taamaakkaluartorli filmiliornerup silarsuaaniittut peqatigalugit Naalackersuisut suleqatigiissitamut tigussaasunik innersuussuteqarnissaannut tunngavissiissasut naatsorsuutigalugu.

Suleqatigiissitamut suliarissallugit annerusumik soqutiginaateqarsinnaasut tullinnguuttumi sammisat ataatsimiititaliap tikkuarniarpai:

- Filmiliorarneq pillugu inatsimmik suliaqarnissaq
- Filminstitutimik pilersitsineq
- Filmkommissærimik atorfinitsitsineq

Tamakku saniatigut suleqatigiissitap innersuussutinik assigiinngitsunik saqqummiussiinnaassanngitsoq, kisiannili taamatuttaaq pingaartitsitigaluni innersuussutit qanoq timitalerneqarsinnaanerannik eqqarsaateqassasoq, qaqugu piviusunnagortinneqartariaqartut aamma innersuussutit naammassineqarnissaanik kia akisussaasusariaqarneranik eqqarsaatersuuteqartoqassasoq ataatsimiititaliap neriuutigaa.

Kalaallit Nunaanni maanna filmiliornerup silarsuaannut annertuumik soqutiginnittoqarnera ataatsimiititaliap maluginiarpaa. Filmiliornerni kalaallit ilitersuisut, isiginnaartitsisartut inutaaqataasullu takussaagaluttuinnarput aamma Kalaallit Nunaat pillugu filmiliornerup amerliartuinnarput. Upernaaq 2022-mi Cannes festivalimi filmi kalaallit suliarineqartoq siulleg takutinneqaaqarpoq, tamanna ataatsimiititaliap nuannaarutigaa ukiunilu aggersuni Kalaallit Nunaanni filmiliornerup silarsuaaniit suliarineqartut taamatut amerliartornissaat aamma kissaatigalugu.

**4. Siunnersuutip aningaasatigut kingunerisassai**

Inatsisartut Suleriaasianni § 33 imm. 1-imi allassimavoq siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuutip tunngavilersuutaani allaaserineqassasut.

Siunnersuutip piviusunngortinnissaanut aningaasatigut kingunerisassai allaaserineqassasut ataatsimiititaliap maluginiarpaa.

AC-mik ukiup ataatsimik sulisoqarnissaq 500.000 kr-nik aningaasatigut amerlanerunngitsunik kinguneqassasoq ataatsimiititaliap maluginiarpaa.

**5. Ataatsimiititaliap inassuteqaataa**

Siunnersuutigineqartoq akuersissutigineqassasoq ataatsimiititaliap isumaqatigiittup inassutigaa.


Taamatut oqaaseqarluni isumaliutissiissummilu allassimasutut paasinnillutik matumuuna siunnersuut ataatsimiititaliap aappassaaniigassanngortippaa.




Doris Jakobsen Jensen  
Siulittaasoq



Nivi Olsen  
Siulittaasup tullia



Adam Kristensen



Dines Mikaelen



Mariia Simonsen

Uunga

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq

Nuuk, ulloq 17. maj 2022

**Sisamangorneq ulloq 19. maj 2022 nalunaaqutaq 16 kingorna sassartitaanermut atatillugu saqqummiussassaq**

Film.gl-ip siunnersuuteqartoq kiisalu ataatsimiinnermi maanna ingerlasumi immikkoortoq 75-ip maajip 10-ani siullermeerneqarnerani ilassuteqaateqartut qujaffigerusuppai.

Film.gl-ip isumaqatigaa, filmiliornerup silarsuaata inuiaqatigiinni ataatsimut aningaasaqarnitsinnut avammut tunisinermi isertitanik malunnartumik tapiissuteqarsinnaanissaanut ineriartortitsinissamut pisariaqartumik, inuiaqatigiinni aqqissuussaannermi filmiliornerup silarsuaata qulakkeerinniffiqeqarnissaanut maanna piffissaq eqqortuusooq.

Film.gl isumaqarpoq, Kalaallit Nunaat filminut immikkoortortaqqarfeqqanngitsillugu, filmiliornerup silarsuaa pillugu nunat allat Kalaallit Nunaannut pisortatigoortumik suleqatigiinnermik pilersitsisinnaanngitsut. Tamatumunnga assersuutaasinnaavoq filmiliornermut nunat tamalaat tapersersuinissaat pillugu suleqatigiinneq. Filmiliornerup silarsuaata periarfissat tamakku maqaasivai.

Film.gl isumaqarpoq, filmiliornermik silarsuarput inatsisitigut kiisalu allaffissornikkut nunami misigisassarsiortitsinermik inuussutissarsiutitut nutaatut, nunanut allanut tunisinermi isertitanut tapiissuteqarnissamut periarfissalerujussuuartut isigineqassasoq. Tamatumunngali pisariaqarpoq, filmiliornerup silarsuaani inuiaqatigiinni aqqissuussaannermut pisariaqartumut aningaasaliisoqaqqaarnissaa. Kulturikkut pilersitsisutut misigisassaqaartitsinermi inuussutissarsiutitut, kulturikkut aningaasaliissutinit (assersuutigalugu Tips- aamma Lottomit aningaasaliissutinit) filmiliornermut tapiissutinik pissarsisoqarsinnaaginnartariaqarpoq. Peqatigitillugu filmiliornerup silarsuaa inuussutissarsiutinut aningaasaliissutinit aningaasalertinnissamut pitsaannerusumik periarfissaqartariaqarpoq (assersuutigalugu aningaasanut inatsimmi kontomit 64.10.32 Takornariaqarnermik ineriartortitsineq aamma inuussutissarsiornernik siuarsaaneq).

*Film.gl suleqatigiissitat suliarisinnaasaannik immikkoortunik marlunnik pingaarutilinnik erseqqissaarusuppoq:*

- 1. Nammineq filmiliornermut silarsuatsinnut oqartussaasunit tapiissutit.*
- 2. Kalaallit Nunaanni nunat allat filmiliornerannut oqartussaasunit tapiissutit.*

### **1. Nammineq filmiliornermut silarsuatsinnut oqartussaasunit tapiissutit**

Makku ukkatarineqarsinnaapput:

- A. Filminut immikkoortorta qarfik.
- B. Ilinniagaqarnissamut periarfissat.
- C. Misigisassarsiortitsiner mi inuussutissarsiut.
- D. Filmiliornermut tapiissutit.

Kalaallit Nunaanni Filminut Immikkoortorta qarfik oqartussaasutut suliasanik tunineqarsinnaavoq. Filmiliornerup silarsuaani siunersueqatigiinnerusinnaavoq siunnersuinerusinnaalluniluunniit, ajornartorsiutinik filmiliornerup silarsuaanut attuumassuteqartut pillugit Naalakkersuisunut siunnersuinerusinnaavoq (soorlu ilinniagaqarnissamut pisariaqartitat) kiisalu misigisassarsiortitsiner mi inuussutissarsiutinut allanut ataqatigiissaariffiusinnaavoq (soorlu takornariaqarner mi inuussutissarsiut).

Aammattaaq filminut immikkoortorta qarfik Kalaallit Nunaanni filminut arkivimut akisussaasusinnaavoq. Kalaallit filmiliaannik tammartoqareernikuuvoq, filmiliornerup silarsuaata kopiinik tunniussivissaqaqnginnera pissutigalugu.

Nunani allani filminut immikkoortorta qarfik, nunami filmiliornerup pisortanit taperneqarnissamut isumaginninnermut akisussaasusarpoq. Suliassaq taanna filminut immikkoortorta qarfitaarutta aamma tigusinnaavaa.

Piviusumik Film.gl-ip isigaa, illup, EPI aamma Filmiliornerup naqqup iluani ineqarfigisaa, nunamut tamarmut 'Filmiliornerup Illua'-tut iluaqutaasumik ator neqalersinnaasoq.

### **2. Kalaallit Nunaanni nunat allat filmiliornerannut oqartussaasunit tapiissutit**

Makku ukkatarineqarsinnaapput:

- A. Filminut kommissæri.
- B. Kajumissaarinnissamut aaqqiissut.
- C. Nalunaarsuiner mut akitsuut.

Kalaallit Nunaanni Filminut kommissæri oqartussaasutut suliasanik tunineqarsinnaavoq. Tamatumani Kalaallit Nunaat filmiliorfissatut pilerinarsarneqarsinnaavoq (soorlu niuerfinni festivalinilu attuumassuteqartuni peqataanikkut), nunani allani filmiliornerup tapersuisoqarsinnaavoq (soorlu filmiliorfissanik ujartuisartunik Kalaallit Nunaannut qaqqusinikkut).

Filminut kommissæri aamma akisussaaffigisnaavai kajumissaarinnissamut aaqqiissutit allaffissorneri, tassani filmiliornerup nunani allaneersut piumasaqaatinik aalajangersimasunik naammassinnikkunik tapiissutisinnallutik (toqqaannangitsumik isertitaqarneq).

Aammattaaq filminut kommissæri nunat allat filmiliornerannut oqartussaasunit tapiissutit, Kalaallit Nunaat



filmiliorfittut atornerani nalunaarsuinnermut akitsuutiniq akiligaannik qulakkeerinninnissamut akisussaasuusinnaavoq (toqqaannartumik isertitaqarneq).

Filmiliornerup silarsuaani inuiaqatigiinni aaqqissuussaannermik pisariaqartumik pilersitsinissaq tulluassaaq **filmit pillugit inatsimmik** sinaakkusersorneqarnissaa.

Film.gl immikkoortoq 75-ip akuersissutigineqassappat suleqatigiissitamut pilersinneqartussamut peqataarusulluinnarpoq.

Film.gl sinnerlugu  
Inuulluaqqusilluta

Peter Jensen aamma Klaus Georg Hansen

Film.gl  
Mail: [info@film.gl](mailto:info@film.gl)  
Mobil: 54 73 46